

Fas Pita Nægkiariien sə rani mə nəfe i nəkukuə

Nəkukuə i Pita rımərai. Pita in iərmama riti ia twelef nərmama me səvəi Iesu. In rımərai nəkukuə i mərhi pen i revən ti nakalasia me səməme kamharə parei fwe profens riti səvəi Rom kani mə Esia Maenor. Pita rokeikei mə truvehi utə nətərigien səvənraha ti nəri nə mə nərmama me nepwın kamhometə irəha ti nahatətəien səvənraha. Pita rokeikei mə rerınraha tramrhi mə Iesu rokeikei pik irəha, nənə muvehi nəmisəien ti nirəha. Irəha tuhəkurirə noien səvəi Iesu. Irəha tuho iamınha irə ti nəri nə mə Kumwesən rımərfi irəha mə irəha nərmama me səvənhi nənə Iesu remhə ti nirəha. Pita rini pen ti nirəha mə tuhaməkeikei mharə ia narəien sə ro ikinan. In rini pen mwi ti nirəha mə ia tıprənə i nərəhaien rasori, mətə tuhaməkeikei mhərər əknekın, mho nətərigien səvənraha rəpwəmwis, mhəmri pen əknekın nətərigien səvənraha ia Kumwesən, nənə mheitenhi narımnari amasan me səməme tuhəpkuvehe kurirə.

¹*Iou Pita, iou aposol riti səvəi Iesu Kristo.

Iakamrai nəkukuə i rauvehe tukumiaha nərmama pwıspwis me səməme hıamarə kirkiri ia profens me i Pontas, mine Kalesia, mine Kapatosia, mine Esia, mine Pitinia. ²*Kimiaha i nərmama Kumwesən rımərfi kimiaha resi

* **1:1:** Jem 1:1, 2Tim 1:15 * **1:2:** Rom 8:29, 2Tes 2:13, Hip 12:24

pen nətərigien səvənhi sə in ruvəukurən raka fwe kupwən. In rımərfi kımiaha mə Nənımwın səvənhi tro kımiaha hiəuvehe mhəmher, mho nəkur ikinan me səvənhi, nənə, tihəuvehe mho nəkwai Iesu Kristo, tukəfwıəfwı kımiaha ia nıten.

Nəfwakiiən səiou mə Kumwesən trəriari pehe namasanien mine nəmərınuıen rasori mwi m kımiaha.

Pwəh səgnəgini Kumwesən ti nımıruıen vi

³ *Pwəh səgnəgini Kumwesən i in Kumwesən mine Tata səvəi İərımənu səkitaha Iesu Kristo! Napiien səvənhi rasori tukutaha. In ro kitaha sətui mwi ia nımıruıen vi, nənə, mo kitaha səmri pen əknekın nətərigien səkitaha irə. In ro iamınha irə nəpın ro Iesu Kristo rətui mwi ia nemhəien səvənhi. ⁴ *Kumwesən ro kitaha sətui mwi mə tsəuvehi nautə amasan me in truvei pen m nərmama me səvənhi. Nautə amasan me nəha ko həpkımərır mhə, mhəpkəmkemik mhə, nənə nukuraanien səvənraha ko rıpkıwən mhə. Kınəmri amasan nautə me nəha fwe ia neiai tukuvei pehe m kımiaha. ⁵ *Kımiaha nərmama səməme Kumwesən ro tukuahag kımiaha ia nıskaiien səvənhi ti nəri nə mə hıamahatətə irə. In trətui amasan tukumiaha meste tihəuvehi nımıruıen vi sə kınəpnəpenə raka irə tukətoni rier pehe ia nəpın sampam. ⁶ *Ramasan mə rerımiaha ragien ti narımnari me i. Mətə təkwtəkwuni rosi narımnari me səpəmsəpə tuhəuvehe mho nəmısəien m kımiaha ia nəpın

* **1:3:** 2Kor 1:3 * **1:4:** Kol 1:12 * **1:5:** Jon 10:28, 17:11

* **1:6:** 1Tes 5:10, Jem 1:2

ouihi a. ⁷*Narimnari me i kamhəuvehe trahatən pen mə kımiaha hiamahatətə pərhiēn. Aean i kol, nəri auər a mə trıpkıwən mwi nəpın riti, mətə nərmama tuhaməkeikei mhəuvani ia napw ti nətə sasien mə in kol pərhiēn uə rekəm. Ia noien nəha rəmwhen a mwi nahatətəien səkimiaha sə ramasan məpi raka kol, tukaməkeikei ko kımiaha həregi nəmisəien me ti nətə sasien mə hiamahatətə pərhiēn uə rekəm. Nənə mə hiamahatətə pərhiēn, nəpın tukətoni Iesu Kristo rier pehe irə, Kumwesən trəgnəgın kımiaha, muvehi utə nəghımiaha, nənə, muvei pehe nısiāien m kımiaha. ⁸*Nəri auər a mə hiəpkətoni mhə Iesu Kristo, mətə hiokeikei in. Nənə nəri auər a hiəpkətoni mhə nəha təkwtəkwuni, mətə hiaməni nıpərhiēnien irə, nənə, mamhagien. Nagienien nəha hiamregi rasori pık anan iərmama riti ko rıpkını mhə ia nəgkiariien. ⁹*Rerımiaha ramagien iamınha irə ti nəri nə mə hiaməuvehi nəri i sə hiamahatətə irə, in i mə Kumwesən truvehimıru kımiaha.

¹⁰*Profet kupwən me hamətui ia suatuk i Kumwesən truvehimıru nərmama irə, nənə mamhəres mə tukəfo irə. Ia nəgkiariien sə Kumwesən rıməuvei pen mınraha, irəha hani irapw mə Kumwesən trasitu ia kımiaha ia namasanien səvənhi. ¹¹*Nəpın Nənimwın səvəi Kristo sə ramarə ia nırəha rıməkupwən mını irapw nəmisəien me səməme Kristo trıregi ia nıpwran mıne nasoriien sə tukuvei pen mın truvehe

* **1:7:** Job 23:10, Prov 17:3, Aes 48:10, Sek 13:9, Mal 3:3, Jem 1:3

* **1:8:** Jon 20:29, 2Kor 5:7 * **1:9:** Rom 6:22 * **1:10:** Mat 13:16-17 * **1:11:** Sam 22, Aes 53, Luk 24:26-27

kurirə, profet me haməmwur mə tuhəukurən mə nəfe suatuk mine nəfe nəpın narimnari me nəha tuhəier pehe. ¹² *Kumwesən rino pui pen m profet me nəha mə nəgkiariien me səmame irəha kamhəni həpkəgkiari mhə ia nəpın səvənraha mə trasitu ia nırəha, mətə haməgkiari ia nəpın səkimiaha trasitu ia kimiaha. Narimnari me i profet kupwən me həməni təkwtəkwni hiəuvəregi raka rıməuku pen ia tərhui nərmama səmame hənəvisau nəgkiariien amasan səvəi Kristo m kimaha. Nəgkiariien səvənraha rıməuku pen ia Nənımwin İkinan sə Kumwesən rərhi pehe i. Narimnari me i nagelo me irəha mwi hokeikei mə tuhətoni mhəukurən.

Kumwesən sə rinəkwein kimiaha in İəmə İkinan, in rəmher

¹³ Ro pen tihaməkeikei mho nətərigien səkimiaha rərer mwatuk ti noien wok, mho nətərigien səkimiaha pwəh rukurən amasan. Tihəmri pen əknekın nətərigien səkimiaha ia namasanien sə Kumwesən truvei pehe m kimiaha nəpın tukətoni İesu Kristo rier pehe. ¹⁴ *Tiho nəkwai Kumwesən rəmwhen ia nəkwərhakwərha me səmame kamho nəkwai tata me. Fwe kupwən kimiaha hiəreirei nari, nənə mamho noien ərəha me səmame rerimiaha rokeikei pik. Mətə təkwtəkwni tihəpwəh nəsənien ia nətərigien me nəha ravi raka mwi kimiaha. ¹⁵ Kumwesən sə rinəkwein ia kimiaha in İəmə İkinan, in rəmher. Ro İamınhi irə kimiaha mwi tihaməkeikei mho kimiaha nəkur İkinan me, mhəmher ia narimnari

* **1:12:** Efes 3:10 * **1:14:** Rom 12:2, Efes 2:3, 4:17-18

me pam səməme hiamō. ¹⁶ *Iakani iamīnhi irə ti nəri nə mə Nəkukuə Ikinan rani mə, “Tihaməkeikei mho kīmiaha nəkur ikinan me, mhəmher, ti nəri nə mə iou Iəmə ikinan iakəmher.”

¹⁷ *Kīmiaha hiaməkwein Kumwesən mə “Tata.” Mətə in Kumwesən ramo rəmnəmwhen ia nərmama me pam. Trərpwīn noien me səvənraha tresi pen atukwatukw nəfe irəha hənō. Ro iamīnhi irə mine, nəpīn kīmiaha hiamarə ihi ia təkure tiprənə i, tihaməkeikei mhehekīr in, mamho noien səramasan. ¹⁸ *Kīmiaha hiəukurən mə kīneivinari ia kīmiaha hiəuvəier raka ia narəien ərəha nəha kaha kupwən me səkīmiaha həməuvei pehe m kīmiaha. Mətə kīpkərəku raka mhə kīmiaha ia nari riti sə truvehe mərəha məmwhen ia kol mine silva, ¹⁹ *rekəm. Mətə kīnərəku raka kīmiaha ia nite Kristo in nəri keikei ramasan pīk. Kristo in rəmwhen ia kwəti sipsip sə ratukwatukw pam, nemhəien uə nərəhəien riwən anan irə. ²⁰ *Kumwesən ruvərfi raka in fwe tui nəpīn tiprənə ramiwən ihi, nənə təkwtəkwuni rīpko mhə tui nəpīn sampam ruvehe kətoni in rier pehe masitu ia kīmiaha. ²¹ *Ia Kristo kīmiaha hiaməni nīpərhiēien ia Kumwesən sə rino in rətui mwi ia nemhəien səvənhi nənə muvei pen nasorīien min. Ro iamīnhi irə Iəmə sə hiamahatətə irə, mamhəmri pen əknekīn nətəriɡien səkīmiaha irə, in i Kumwesən.

²² *Kīmiaha hiamesi pen nəɡkiariien sə ro

* **1:16:** Lev 11:44-45, Mat 5:48 * **1:17:** Mat 6:9, Rom 2:11, 2Tim 4:14, Rev 2:23 * **1:18:** 1Kor 6:20 * **1:19:** Wok Me 20:28, Hip 9:12-14, 1Tes 1:2 * **1:20:** Wok Me 2:23, Efes 1:4 * **1:21:** Jon 14:6, Rom 4:24, 5:1-2, Rom 10:9 * **1:22:** Jon 13:34, Rom 12:10

nɪpərhiɛniɛn mamhokeikei pərhiɛn piəvtaha me. Ia noien nəha hiənəpərhi raka nimiruien me səkimiaha həmher. Mətə kimiaha tihaməkeikei mhəripin mamhokeikei pərhiɛn kimiaha me ia rerimiaha pam. ²³ *Kimiaha hiənətui mwi rəmwhen nəkwərhakwərha me, nənə, nimiruien vi sə hiənətui mwi irə rɪpkuku pen mhə ti tata riti sə tremhə, mətə ruku pen ti Tata riti sə trɪpkemhə mhə. Nəgkiariien səvəi Kumwesən sə ramiru mamarə rerin rino kimiaha hiətui mwi. ²⁴ *Iakani iamɪnhi irə ti nəri nə mə Nəkukuə Ikinan rani mə, “Nərmama me pam həmwhen ia nurhi,
nənə namasaniɛn səvənraha rəmwhen ia tihi nurhi.

Nurhi nəha ramaukei, nənə tihin me kamhəsas,
²⁵ mətə Nəgkiariien səvəi Iərimənu ramarə ia nuk nuk me.”

Nənə in i nəgkiariien sə kinəvisau m kimiaha.

2

¹ *Ro pen kimiaha tihaməkeikei mhəpwəh noien ərəha me pam. Tihəpwəh mwi neikuəien, mhəpwəh mwi noien nətərigiɛn səkimiaha ro kəru. Tihəpwəh mwi nəmwəkien ia kimiaha me, mhəpwəh mwi niniɛn nɪkaremiaha me.

² *Kimiaha tihaməkeikei mhəuwehe mhokeikei pik nəgkiariien səvəi Kumwesən sə rəmher mhəmwhen iəkunouihi əmtəmetə me i kamhasək mə tuheɛsɪs. Nəgkiariien i tro kimiaha hiəuwehe mhəpwinari, nənə, Kumwesən ruvehimiru kimiaha. ³ *Nəkukuə Ikinan rani mə, “Kimiaha

* **1:23:** Jon 1:13, Hip 4:12 * **1:24:** Jem 1:10-11 * **2:1:** Efes 4:22, Jem 1:21 * **2:2:** Mat 18:3, 1Kor 3:2 * **2:3:** Sam 34:8

hiənanani əghan namasanien səvəi İərimənu mhətoni mə ramasan pək anan.”

Kristo in kəruəterei mīru

⁴ *Həuvehe ti Kristo. In nəha kəruəterei mīru nəha nərmama me həni mə rərəha, mhəpwəh, mətə ia nəmri Kumwesən in kəruəterei keikei anan sə in rīmərfi. ⁵ *Kimiaha mwī hiamwhən ia kəruəterei mīru me kauvrhəkin nimwə ia nirəha, nimwə sə Nənimwīn ramarə irə. Ia nimwə nəha, kimiaha hiamwhən ia pris ikinan me kamhousi əpune nərimīru me mamhəuvei pen m Kumwesən. Mətə narimnari me səməme kimiaha hiaməuvei pen rīpko mhə nīpwrai nari mətə kwa nənimwīn. Nənə Kumwesən raməkwein amasan ia narimnari me nəha hiaməuvei pen min ti nəri nə mə hiaməuvei pen ia nəghi İesu Kristo. ⁶ *Rəmwhən ia Nəkukuə İkinan rani mə,

“Hətoni ro. İakaməri kəruəterei riti fwe Saeon,^a
in kəruəterei keikei anan sə iou iakimərfi,
kəruəterei nəha tukostat kuvrhəkin nimwə
irə,
nənə iərmama sə trīni nīpərhienien irə, in
trīpkauris mhə.”

⁷ *Ro iamīnhi irə, kəruəterei nəha in nəri keikei tukumiaha nərmama səməme hiaməni nīpərhienien irə, mətə nərmama səməme həpkini mhə nīpərhienien irə, kəruəterei nəha rəmwhən ia nəgkiariien i ia Nəkukuə İkinan rani mə,
“Kəruəterei nəha nəmə kamhəuvrhəkin nimwə
hənuə rərəha, mhəpwəh,

* **2:4:** Mat 21:42, Aes 28:16

* **2:5:** Efes 2:21-22, Eks 19:6, Aes

61:6, Rev 1:6, Rom 12:1

* **2:6:** Rom 9:33, Efes 2:20

a 2:6:

Seon in Jerusalem

* **2:7:** Mat 21:42

təkwtəkɥuni nəha ruvəuvehe mīno
 kəruətərei sə rəpi raka pam kəruətərei
 me, məkwtəmhiri əknekīn pam nimwə.”

8 *Nənə Nəkukuə Ikinan rani mwi mə,
 “In i kəruətərei riti sə nərmama tuhapəti irə,
 mine kəpwier sə tro irəha həmwēi”

Irəha kamhapəti irə ti nəri nə mə kamhərui
 nəgkiariien səvəi Kumwesən mamhesi pen a nəfe
 Kumwesən ruvəukurən raka fwe kupwən məmri
 mə tuho.

9 *Mətə kimiaha nərmama ia kwənəkɥus i
 Kumwesən rīmərfi kimiaha, kimiaha pris me səvəi
 kig, kimiaha nərmama ikinan me ia kusen kua-
 tia, kimiaha nərmama me səvəi Kumwesən əpa.
 Kino kimiaha iamīnha irə mə kimiaha hiəukurən
 nini irapwien narimnari amasan me Kumwesən
 rino. In rinəkwein ia kimiaha mə tiharaka ia
 nəpitəvien mhəuvehe ia nukuraanien amasan
 səvənhi. 10 *Fwe kupwən, kimiaha nərmama auər
 a me, mətə təkwtəkɥuni kimiaha nərmama me
 səvəi Kumwesən. Fwe kupwən, kimiaha nərmama
 napiien səvəi Kumwesən riwən tukumiaha, mətə
 təkwtəkɥuni kimiaha nərmama napiien səvənhi
 ramarə tukumiaha.

11 *Nərmama keikei me, kimiaha hiəmwhen
 iəpwiəpwiə me mine nərmama imwənraha riwən
 ia tīprənə i. Ro pen iakani pehe tukumiaha i
 mə tihəpwəh nəsenien noien ərəha me nəha
 nīpwramiaha rokeikei pik səməme kamharuagən
 ia nəpīn me mə tuhouraha nīmīruien səkimiaha.

* **2:8:** Rom 9:33 * **2:9:** Aes 9:2, Aes 40:20-21, 1Tes 2:5, Taet
 2:14, Wok Me 26:18, Efes 5:8 * **2:10:** Rom 9:25 * **2:11:** Sam
 39:12, Kal 5:17,24, Jem 4:1

12 *Təkwətəkwuni nərmama səməme həreirei İərimənu kamhəni ərəha kimiaha mə kimiaha nəkur ərəha me. Ro iaməhi irə narəien səkimiaha hiamarə irə ia nənimənraha traməkeikei matukwatukw, pwəh irəha hətoni noien amasan me səkimiaha, nənə mhəuvehi utə nəghi Kumwesən ia nəpən nəha in truvehe irə.

Nərmama me səvəi İesu Kristo tuhaməkeikei mhəsiai nərmama səməme kamhərimənu

13 *Ti nəri nə mə kimiaha nərmama me səvəi İərimənu səkitaha, tihaməkeikei mhəsiai nərmama me pam səməme haməuvehi nasorien mamhərimənu. Tihəsiai ia kig sə in rasori anan, 14 mhəsiai mwı ia nəmə asori me səməme in ramərhi irapw irəha kamhərimənu ia nəghin. Nəmə asori me nəha, kig ramərhi irapw irəha mə tuho nəmisəien m nərmama səməme kamho noien ərəha, nənə mhəgnəgini səməme kamho noien amasan. 15 *Kimiaha tihaməkeikei mhəsiai nəmə asori me pam ti nəri nə mə Kumwesən rokeikei mə noien amasan me səkimiaha trəsisəg tərhui nərmama me i həreirei nəri. Pwəh irəha həpwəh mwı niniien nəgkiariien arməri me. 16 *Ramasan mə hiamarə mhəmwhen ia nərmama kineivinari ia nirəha, mətə tihəpwəh niniien mə, “Eh, kineivinari ia nirak. İakukurən noien nəfe noien ərəha iakokeikei.” Kimiaha tihaməkeikei mamharə mhəmwhen ia iotukwininari me səvəi Kumwesən. 17 *Tihəsiai nərmama me pam. Tihokeikei piəvtaha me, nənə tihəhekir mhəsiai Kumwesən, nənə tihəsiai kig sə ramərimənu.

* 2:12: Mat 5:16, Luk 19:44 * 2:13: Taet 3:1 * 2:15: 1Pit 3:16
 * 2:16: Kal 5:13 * 2:17: Rom 12:10, Prov 24:21, Mat 22:21

18 *Kìmiaha slef me, tihaməkeikei mho nəkawai nəmə asori me səkìmiaha, nənə mhəuvei pen nìsiaien mìnraha. Tiho iamìnhi irə mìnraha pam, nəmə asori me səməme kamho rìməru mamasan m kìmiaha mine nəmə asori me səməme kamho noien skai me m kìmiaha. 19 Rəfo hiamò a narimnari me səməme hatukwatukw mətə nəmə asori me səkìmiaha kamho rərəha ia kìmiaha? Trini mìnua hiəukurau ia nəpìn skai me nəha, mamhəti pen a m Kumwesən, Kumwesən trəkwein amasan ia kìmiaha. 20 *Trini mìnua hiamò noien ərəha, kamo nəmisəien m kìmiaha tukwe, hiamò nətərigien səkìmiaha rəpwəmwis ti nuvehien nəmisəien nəha, noien nəha ko kəpwəh nəgnəginiien kìmiaha tukwe. Mətə mə kìmiaha hiamò a noien amasan, nənə kamo nəmisəien m kìmiaha tukwe, Kumwesən trəkwein amasan ia kìmiaha trini mìnua hio nətərigien səkìmiaha rəpwəmwis ti nuvehien nəmisəien nəha. 21 *Kumwesən rìnəkwein ia kìmiaha mə tihəuvehi nəmisəien, ti nəri nə mə Kristo in mwi rìməuvehi nəmisəien tukumiaha. In rìməkupwən mahatən noien atukwatukw nəha mə kìmiaha tihesi pen a təmwheki nisun. 22 *Nəkukuə Ikinan rani mə,

“In rìpko mhə noien ərəha riti,
kìpkregi mhə neikuəien riti ia tərhun.”

23 *Nəpìn nərmama həni nəgkiariien ərəha irə, mətə in rìpkəski mhə irəha. Nəpìn in rìregi nəmisəien ia nìpwran, mətə in rìpkìni mhə mə trərpwìn tai nərəhaien. Mətə rìnəmri pen narim-

* 2:18: Efes 6:5 * 2:20: 1Pit 3:14,17, 1Tes 4:14 * 2:21: Mat 16:24, Jon 13:15 * 2:22: Jon 8:46 * 2:23: Aes 53:7, 1Tes 3:9

nari me pam ia rəgi Kumwesən sə raməkiri atukwatukw nari. ²⁴ *In rıməuvehi noien ərəha me səkitaha ia nıpwran ia nei kamarkuauı mə ia nıkaren səvəı noien ərəha kıtaha tsemhə nənə ia nımıruien səkitaha tsamo noien atukwatukw. Nəmisəien me səvənhi rıməregi ia nıpwran rıno kımiaha hiəuvehe mhəsanın. ²⁵ *Fwe kupwən kımiaha hiəmwhen ia sipsip me səməme hənəruei, mətə təkwtəkwuni kərari ia kımiaha hiəvərərıg mhəuvəuvehe tı İərmama ramətui tı sipsip me, in i İərmama ramətui tı nımıruien səkımiaha.

3

Nıpran mine nərman me səvənraha

¹ *İa noien a mwı nəha, kımiaha nıpran me tıhaməkeıkeı mhəsıai nərman me səkımiaha. Nənə trını mınuə irəha nerpwın həpkını mhə nıpərhiendien ia nəgkiariien səvəı Kumwesən, mətə noien a səkımiaha truvi irəha həuvehe mhahatətə. Noien səkımiaha rəmwhen məpi raka mə hiəgkiari mınraha. ² Nəpın irəha hətoni mə noien səkımaha rəmher, hiaməsıai irəha, nənə noien nəha truvi irəha həuvehe mahatətə. ³ *Rərəha mə hıamasan pen ia nıpwramiaha iruə ia noien nəha sə hıamərəri nımwai nukwənemiaha, mamhəuvei pen marəmarə me kınə ia kol mine tınari amasan me. ⁴ Mətə tıhamasan pen imwə ia rerımiaha sə kıpəkətoni mhə. Ramasan mə tıhəuvehe mho nıpran səməme nətərıgıen səkımiaha rəpou mafafa. Noien iamınha irə ramasan anan ia nəmri Kumwesən mıpkıwən mhə. ⁵ In i noien səvəı

* **2:24:** Hip 9:28, Rom 6:2,11, Aes 53:5 * **2:25:** Aes 53:6, Esik 34:5-6, Mat 9:36, Jon 10:14 * **3:1:** Taet 2:5 * **3:3:** 1Tim 2:9

nīpran ikinan me fwe kupwən səməme hənəmri pen əknekīn nətərigien səvənraha ia Kumwesən. Irəha hənəmāsiai nərman me səvənraha, nənə ia noien nəha hənāmamasan pen ia rerīnraha.

⁶ *Rəmwhen ia Sera, in rīno nəkwai Epraham, nənə maməkwein in mə iəmə asori səvənhi. Nənə kīmiaha nīpwnəti Sera me trīni mīnuə hīamo noien amasan, mhəpkehekīr mhə nari riti sə ramo nehekīrien.

⁷ *Ia noien a mwi nəha, kīmiaha nərman me tihaməkeikei mharə kīmiaha nīkare rəgīmiaha me, mhəukurən mə irəha pran nīskaiien səvənraha rīpkiskai pīk mhə rəmwhen ia iərman. Kīmiaha tihaməkeikei mhəuvei pen nīsiāiien mīnraha, tī nəri nə mə kīmiaha mīnraha tihəuvehi pəri nəri amasan i nīmīruien rerīn. Tiho iamīnha irə pwəh nari riti trəpwəh nəsisəgīen nəfwakiien me səkīmiaha

Nəmisāien kamregi tī noien amasan

⁸ Nəgkiariien sampam. Kīmiaha pam tihaməkeikei mho nətərigien səkīmiaha ruvehe mo kuatia, tihapi kīmiaha me, mhokeikei kīmiaha me, mho rerīmiaha rīməru tukumiaha me, mhəuvehi irapw nətərigien səkīmiaha. ⁹ *Trīni mīnuə nərmama kamho rərəha ia kīmiaha, mətə tihəpwəh nərpwīnien tai nərəhaien. Trīni mīnuə nərmama hai m kīmiaha, mətə tihəpwəh nərpwīnien. Mətə tihəkwein amasan a ia nīrəha. Tiho iamīnhi irə tī nəri nə mə Kumwesən rīnəkwein kīmiaha mə tiho noien nəha, mə

* **3:6:** Jen 18:12 * **3:7:** Efes 5:25 * **3:9:** Mat 5:44, 1Tes 5:15, 1Pit 2:23

hiəuvehi namasanien səvənhi. ¹⁰ Nəkukuə Ikinan rani mə,

“Iərmama sə rokeikei nimiruien amasan,
nənə mokeikei mə triregi ramasan ia nəpən me
pam,

in traməkeikei məpwəh niniien mwi nəgkiariien
əərəha me ia nəramin,
məpwəh mwi neikuəien ia tərhun.

¹¹ In traməkeikei mirərig ia noien əərəha me
səvənhi, nənə mo a narimnari amasan
me.

In traməkeikei mətui suatuk səvəi
nəməriniuēn, nənə mukurirə i.

¹² In traməkeikei mo iamīnhi irə ti nəri nə mə
Iərimənu ramətoni amasan nərmama
səməme hatukwatukw,

nənə mamətərig amasan ia nəfwakiiēn
səvənraha,

mətə in raməmwəki səməme kamho noien əərəha.”

¹³ Trini minuə hiəskai pik ti noien amasan me,
sin trouraha kimiaha? Iərmama riti riwən!

¹⁴ *Mətə trini minuə nəpən me nepwīn nərmama
kamho kimiaha hiamregi rərəha ia nipwramiaha
ti noien atukwatukw səkimiaha, mətə ia nətərigien
səkimiaha, kimiaha tihəregi ramasan. Tihəpwəh
nehəkirien ia nirəha, mhəpwəh nətərig pikien.

¹⁵ Mətə ia rerimiaha tihəsiai Kristo mə in Iərimənu
səkimiaha. Tihərer mwatuk ia nəpən me pam
ti niriwenien nəgkiariien səvəi nisəməme nəha
nərmama səməme tuhəres ia kimiaha mə rəfo
hiaməmri pen əknekin nətərigien səkimiaha
ia Iesu. ¹⁶ *Mətə tihəgkiari məru mīnraha ia
nisiaiiēn, mhəpwəh noien nari riti sə tro hiəregi

* **3:14:** Aes 8:12-13, Mat 5:10, 1Tes 2:20, 4:14 * **3:16:** 1Tes 2:12

fwe ia rerimiahaha mə hiəno nəərəhaien. Tiho əpa noien amasan me ti nəri nə mə kimiahaha nərmama me səvəi Kristo. Trini minuə hiamə iaminhi irə nərmama me i kəmhəni nəkaremiaha mə noien səkimiahaha rərəha tuhauris ti nəgkiariien ərəha me səvənraha. ¹⁷ *Trini minuə ia nətərigien səvəi Kumwesən mə hiaməuvehi nəmisəien ti noien amasan me səkimiahaha, ramasan pik anan mwi məpi raka mə hiaməuvehi nəmisəien ti noien ərəha me səkimiahaha. ¹⁸ *Ro iaminhi irə ti nəri nə mə Kristo rimamhə ti noien ərəha me. Rimamhə nəpən kuatia a rinəmwhen. Ko ripkəmhə mhə mwi ia nəpən riti. In iərmama atukwatukw anan, mətə rimamhə ti nərmama həkətukwatukw mhə mə truvehi kimiahaha hiəuvən ti Kumwesən. Hənousi əpune in nənə nīpwran remhə, mətə Nənimwīn ro in rətui mwi ia nemhəien səvənhi, ¹⁹ nənə ia nīskaiien səvəi Nənimwīn nəha in revən mini irapw nəgkiariien riti ti nənimwīn me i ia kalapus, ²⁰ *səməme hənəmərui nəkwai Kumwesən fwe kupwən anan nəpən Kumwesən ramo nətərigien səvənhi raməpwəmwis mameitenhi ia nəpən Noa rinauvrhəkin nitətə. Nərmama eit a, irəha kəmhəmak ia nəkwai nitətə, Kumwesən riməuvehimiru irəha ia nui. ²¹ *Nui nəha, in nə nənimwi pəptaes sə rauvehimiru kimiahaha nəha təkwtəkwni. Pəptaes i ripko mhə nīpwran i mə rinaikuas raka nəmtigei ia nīpwrai iərmama, mətə nīpwran mə hiəres Kumwesən mə rerimiahaha truvehe mamasan məmher. Pəptaes nəha rukurən nuvehimiruien kimiahaha iaminha irə ti nəri nə mə Iesu Kristo rinətui mwi ia

* **3:17:** 1Tes 2:20 * **3:18:** Rom 6:10, Efes 2:18 * **3:20:** Jen

6–7 * **3:21:** Hip 10:22

nemhæien sævæhi. ²² *Iesu naha, in ruvavæn raka fwe ia neiai, mamækure ia nikare Kumwesæn mwatuk, nagelo me, mine nænimwîn me sëmæme kamhæuvehi nasoriien mine niskaiien kamhæsiai in, mamho nækwan.

4

Naræien kamarə irə kamesi pen nækwai Kumwesæn

¹ *Næpîn Kristo ramarə ia tîprənə i, in rîregi næmisæien ia nîpwræn. Ro pen kîmiaha mwi tihamækeikei mhæuvehi nætærigien ræmwhen ia sævæhi mæ tro kîmiaha hiæskai, tî næri næ mæ nærmama sëmæme kamhæregi næmisæien ia nîpwrænraha ræmwhen ia Kristo, irəha hæpwæh mwi noien noien ærəha. ² *Ro pen næpîn hiamarə ia tîprənə i, tihæpwæh nesi penien noien ærəha me sëmæme rerîmiaha rokeikei, mætə tihesi pen suatuk sævæi noien nækwai Kumwesæn.

³ *Næpîn sæ ruvæuvehe muvækurau raka hiænarə irə rînæpwæmwis minæmwhen. Ia næpîn naha kîmiaha hiænamo noien ærəha me sëmæme nærmama hæreirei Kumwesæn hokeikei pik. Hiamæiri æpnæpen kîmiaha me, mamho noien ærəha me nîpwræmiaha rokeikei, mamhænimwi nænimwiien skai mamhakonə irə, mamhætui pik nærəhaien, mamho lafet ærəha me, nənə mamhæfwaki m nænimwi næri me noien i in noien ærəha anan. ⁴ Ipwet mine nærmama me naha hæreirei Kumwesæn nænimenraha ramier tî næri næ mæ kîmiaha tihæpkaiu mhə mhæuvæn

* **3:22:** Mat 22:44, Efes 1:20-21 * **4:1:** Rom 6:2,7 * **4:2:** 1Jon 2:16 * **4:3:** Efes 2:2-3

kimiaha minraha, mhəpko mhə noien ərəha me sə rasori pik anan. Nənə irəha kamhəni ərəha kimiaha tukwe. ⁵*Mətə irəha tuhaməkeikei mhəni irapw ti Kumwesən mə hənəfarə irə. In ramərer mwatuk mə trəkiri nərmama həuvamhə mine səməme kamhəmiru. ⁶*Ro pen kinəvisau raka mwi nəgkiariien amasan səvəi Kristo m nərmama səməme həuvamhə, mə nəri auər a haməuvehi nərpwinien ia nipwranraha mhemhə rəmwhen ia nərmama pam, mətə ia nənimwinraha kamharə mamhesi pen nəkwai Kumwesən.

⁷*Nəpən sə narimnari me pam tuhəiwən irə ruvəuvehe ipaka. Ro pen tihəpwəh nakonəien ia nənimwiien skai. Nətərigien səkimiaha traməkeikei məmak amasan mə hiəukurən nəfwakiien. ⁸*Nəri sə tihəkupwən mho in i tihaməkeikei mhokeikei kimiaha me ia rerimiaha pam ti nəri nə mə nokeikeiien ramousəman noien ərəha me həpik hiəpkətoni mhə. ⁹*Ramasan mə tihəsevər ia rukwənu me səkimiaha tukumiaha me, mhəpwəh nəgkiari əgkiari pikien tukwe. ¹⁰*Kimiaha kuatia kuatia hiaməuvehi nari riti sə Kumwesən riməuvei pehe m kimiaha ramo hiamskai ti noien wok səvənhi. Ro iamini irə tihaməkeikei mho rəmwhen ia iotukwininari sə ramətui amasan ti nautə səvəi iəmə asori səvənhi, nənə, mhəuvehi namasanien me i səpəmsəpə Kumwesən rinəriari pehe, mhasitu ia kimiaha me irə. ¹¹*Trini minuə kimiaha riti in iərmama səvəi nəvisaiien, ramasan mə in trəvisau mini irapw

* **4:5:** Wok Me 10:42 * **4:6:** Rom 8:10, 1Kor 5:5 * **4:7:** Rom 13:11-12, 1Kor 10:11, 1Jon 2:18 * **4:8:** 1Pit 1:22, Jem 5:20 * **4:9:** Hip 13:2 * **4:10:** Rom 12:6-8 * **4:11:** 1Kor 10:31

nəgkiariien səvəi Kumwesən. Trini minuə kímiaha riti in iərmama səvəi nasituien, ramasan mə in trasitu, mo ia nəsaninien sə Kumwesən rauvei pen min. Mə kímiaha hio iamínha irə, nərmama tuhətə narimnari me hiamo nənə mhəgnəgini Kumwesən ti Iesu Kristo. Pwəh nasoriien mine nərimənuien krauevəh tukwe in ia nuk nuk me. Ouəh, pwəh ro iamínhi.

Nəmisəien kamo m nərmama me səvəi Iesu Kristo

¹² *Nərmama keikei me. Rərəha mə hiamərkərinari ia nəmisəien i rəmwhen ia napw sə rauvehe tukumiaha nəha təkwtəkwuni mə tro mətə sas ia nahatətəien səkímiaha. Hiəukurən mə rípko mhə kímiaha əpa hiamregi nəmisəien me iamínha irə. ¹³ *Mətə ramasan mə rerímiaha tragien ti nəri nə mə nəmisəien me i hiamregi həmwhen a ia səməme Kristo riməregi. Trini minuə hiamo iamínhi irə, nənə rerímiaha tragien pík anan nəpín tukətoni in rier pehe ia niskaiien səvənhí. ¹⁴ *Trini minuə nərmama kəmhəni ərəha kímiaha ti nəghi Kristo, nənə, rerímiaha tragien, ti nəri nə mə Nənimwín asori səvəi Kumwesən ramarə ia kímiaha. ¹⁵ Mətə rərəha mə kímiaha riti rousi əpune iərmama, uə rakres, uə rərui loa, uə rani neikuəien mamouraha nəghi iərmama irə. Trini minuə kímiaha riti ro iamínhi irə, ratukwatukw a mə tuko nəmisəien min. ¹⁶ *Mətə trini minuə kamo nəmisəien m kímiaha riti ti nəri nə mə in iərmama riti səvəi Kristo, ramasan mə iərmama nəha trəpwəh naurisien, mətə pwəh

* **4:12:** 1Tes 1:6-7 * **4:13:** Wok Me 5:41, Rom 8:17, 2Tim 2:12, Jem 1:2 * **4:14:** Sam 89:50-51, 1Tes 2:20 * **4:16:** Wok Me 11:26, Fil 1:20

in rini nēghi Kristo muvehi utə Kumwesən irə.
 17 *Iakani iamīnhi irə ti nəri nə mə nəpīn sə
 Kumwesən trəkiri noien me səvəi nərmama irə
 ruvəuvehe nəha təkwtəkwuni, nənə in trukupwən
 məkiri noien me səkitaha nərmama səməme
 samarə ia nəkwai nimwə səvənhi. Trini minuə
 rukupwən ia kitaha, nənə trəfo ia nərmama
 səməme kamhərui nəgkiariien amasan səvənhi?
 In trəkiri noien me səvənraha kurirə ikin, mo
 riskai mwi minraha məpi raka. 18 *Nəkukuə
 lkinan rani mə,

“Trini minuə rəknekīn ti nərmama atukwatukw
 me mə tuhəuvehi nīmīruien,
 nənə rəfo ia nərmama səməme həkisīai mhə
 Kumwesən mamho noien ərəha, irəha
 tuhəfa mhəuvehi nīmīruien?”

19 *Ro iamīnhi irə nərmama səməme kamhəregi
 nəmīsīien, mətə ti nəri nə mə nətərigien səvəi
 Kumwesən, ramasan mə irəha tuhaməmwur
 pen ia noien amasan, nənə, mhəmri pen
 nīmīruien səvənraha ia rəgi Kumwesən mə trətui
 amasan tukwe. Irəha həkurən nətīgiteien irə.
 In Kumwesən rino neiai mīne tīprənə mīne
 narimnari me pam.

5

*Nəvəhagien revən ti elta me səvəi nəfwakiiēn mīne
 ntəmaruə me*

1 *Nənə iakokeikei mə takəgkiari kwopti m
 kīmīaha elta me səvəi nəfwakiiēn. Iou elta
 riti səvəi nəfwakiiēn iakəmwhen a ia kīmīaha.
 Iakinətoni Kristo ia nənimek nəpīn rīregi

* 4:17: Jer 25:29, 2Tes 1:8

* 4:18: Luk 23:31

* 4:19: Sam

31:5 * 5:1: Rom 8:17

nəmisəien me ia nīpwran. Narimnari asori me i rīpko mhə tui həier pehe iou mwi takətoni.
 2 *Kimiaha tihaməkeikei mhətui amasan ti nərmama me səvəi Kumwesən səməme in rinəmri irəha ia rəgimīaha. Irəha həmwhen ia sipsip me səvənhi. Rərəha mə tihətui amasan ti nirəha rerimīaha rəpwəh nagiēnien, mətə tihətui amasan ti nirəha rerimīaha rəgiēn rəmwhen Kumwesən rokeikei. Nənə rerimīaha trəpwəh nīrhīien mə tihəuvehi mane irə. Mətə tihətui amasan a ti nirəha ti nəri nə mə rerimīaha ramagiēn mə tihəsitu. 3 *Nənə rərəha mə tihəfiətə kimiaha me, mamhərimənu ia sipsip me i səməme Kumwesən rinəmri irəha ia rəgimīaha, mətə tiho noien sə ratukwatukw mamasan mə irəha həkurən nətoniēn mhesi pen noien səkimīaha. 4 *Iəmə sə rasori anan ia nərmama səməme kamhətui ti sipsip me trier pehe, nənə nəpīn nəha in trəgnəgini kimiaha muvei pehe nasoriēn m kimiaha sə trīpkiwən mhə.

5 *Ia noien a mwi nəha kimiaha ntəmaruə me tihaməkeikei mhəsiai elta me səvəi nəfwakiēn. Kimiaha pam anan tihəuvehi irapw nətərigiēn səkimīaha reiwaiu mhasitu ia kimiaha me, ti nəri nə mə Nəkukuə Ikinan rani mə,
 “Kumwesən rerin rīpkagiēn mhə ti nərmama səməme kamhəfiətə ia nirəha,
 mətə raməriari pen namasanien səvənhi m nərmama səməme kamhəuvehi irapw irəha.”

6 *Ro pen kimiaha tihəuvehi irapw atukw kimiaha,

* 5:2: Jon 21:15-17, Wok Me 20:28, Flm 14, Taet 1:11 * 5:3:
 2Kor 1:24, Fil 3:17, Taet 2:7 * 5:4: Hip 13:20, 1Kor 9:25 * 5:5:
 Efes 5:21, Jem 4:6 * 5:6: Mat 23:12, Jem 4:10

mharə tegin rəgi Kumwesən əsanin, mə in truvehi utə kimiaha ia nəpın atukwatukw səvənhi. ⁷*Nənə tihəuvehi pam katipə pəmpəm me səkimiaha mhəuvehe mhəmri pen m Kumwesən ti nəri nə mə nəpın me rerin ramrhi kimiaha.

⁸*Hətui mhətui amasan ti nəri nə mə iəremhə asori Setan raməmwəki kimiaha. In rəmwhen ia laeon riti sə raməkri asori mamavən mamətui iərmama mə trəni. ⁹*Tihərer əknekın ia nahatətəien səkimiaha mhəpwəh nəsenien in, ti nəri nə mə hiəukurən mə ia kwopun me pam ia tıprənə i kamo nəmisəien m piəvtaha me ti nəghi Iesu rəmwhen a ia nəmisəien me i kamo m kimiaha.

¹⁰*Kumwesən in nukune namasanien me pam. In rinəkwein ia kimiaha hiəuvehe mho kuatia kimiaha Kristo mə tiharə kimiaha min ia nasoriien səvənhi sə trıpkıwən mhə. Kurirə ia nəmisəien kwakwa nəha hiamregi, in tromasan kimiaha, məmri əknekın kimiaha hiəuvehe mhəskai mhəpwəh nikiukiuien. ¹¹Pwəh in rərimənu ia nuk nuk me. Ouəh, pwəh ro iamınhi.

Nəgkiariien sampam

¹²Saelas i kimrau min, iakamətoni mə in piəvtaha riti iakukurən nətigiteien irə, in rinasitu ia nirak mirai pen nəgkiariien səiou ia nəkukuə i. Iakamərhi pehe nəkukuə i tukumiaha, məmərpiwı əknekın kimiaha, mani irapw mə in i namasanien pərhiən səvəi Kumwesən tihərer əknekın irə.

* **5:7:** Sam 55:22, Mat 6:25-30 * **5:8:** 1Tes 5:6 * **5:9:** Efes 6:11-13, Jem 4:7 * **5:10:** 1Tes 2:12, 1Tes 1:6

13 *Pran sə ramarə ia Papilon^a Kumwesən rımərfi kımiaha min, in rani ramasan tukumiaha, nənə nərık Mak, in mwi rani ramasan tukumiaha.

14 *Tihəni ramasan tukumiaha me, mhakei m kımiaha me ia nakeiien sə rahatən nokeikeiien. Pwəh nəmərınuien tramarə tukumiaha pam nərmama me səvəi Kristo.

* **5:13:** 2Tim 4:11 **a 5:13:** Ia vas 13 Pita rini nəgkiariien i mə, “Pran sə ramarə ia Papilon.” Rıpkə mhə Papilon taon asori nəha Oltestamen raməgkiari irə, mətə rosi Pita rani Papilon in taon nəha Rom. Pran sə ramarə fwe ikin in nəha nakalasia me səvəi Iesu Kristo ia taon nəha. * **5:14:** 1Kor 16:20

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 11 Nov 2022 from source files dated 30 Nov 2021

26b0f540-c192-5878-be67-18ede9ab1416